

Yikinika amatlajkuiloli tlen Pablo okinmijkuilili in tlaneltokakeh

Corintios

1 ¹Ne niPablo, in toYejwatzi okimonekilti onechnotzki ma nieto nitiotlatitlanili de Jesucristo. Ne ivan tokni Sóstenes ²timechon-tlajkuililiah imejvah tlaneltokakeh de toYejwatzi, tlen inchantih Corinto, tlen toYejwatzi omechchi iaxkavah itech Cristo Jesús. In toYejwatzi omechnotzki para xiekah igentejvah san sekka invan nochtin tlen oksekimeh gentejtih tlen ik sentetl kiyektenevah itoka in toTeko Jesucristo, tlen mochijtok inTeko iva tejvah noijki toTeko. ³To-Tajtzin Dios ivan toTeko Jesucristo ma imechpialikah iknomachilistli iva yolsevilistli.

Pablo motlasojkamati inavak toYejwatzi

⁴Nochipa nimotlasojkamati inavak toYejwatzi por imejvah, por yen iknomachilistli tlen toYejwatzi omechmakak itech Cristo Jesús. ⁵Itech Cristo, toYejwatzi omech-rikojtih itech inmoyolo de nochi tlamantli, itech nochi tlen inkijtovah iva itech nochi tlen inkimatih. ⁶Yejón kitemaka kuenta ke tlen ne onimechilvi de yen Cristo yejón yi

neli. ⁷Iva ijkó, amitla imechpolova nion se velitilistli tlen toYejwatzi kitemaka, mientras sa inkichixtokeh in tonali ijkuak valmuikas in toTeko Jesucristo. ⁸Ye imechyekketos itech inmotlaneltokalis asta sa ik tlami tonali, para amika imechtlajtlakoltis de itla ijkuak valmuikas in toTeko Jesucristo. ⁹In toYejwatzi nochipa kichiva tlen kijtova, iva Ye omechnotzki para xisetitokah ivan iKone Jesucristo, tlen toTeko.

Tlaneltokakeh tlen moxexelovah

¹⁰Nimechtlatlavtia, noknivah, ika itoka toTeko Jesucristo, nochtin ximotlajtolajsikah iva amo ximoxexelokah. Xisetitokah, xikpixtokah san se inmotlayejyekol iva san se inmotlanekilis. ¹¹Ijkó nimechilvia, noknivah, porke sekimeh tlen de ikalijtik in Cloé onechilvijkeh ke inmokualaniah entre imejvah. ¹²Kijosneki sekimeh de imejvah kijtovah: “Ne nipovi ivan Pablo”. Oksekimeh kijtovah: “Ne nipovi ivan Apolos”. Oksekimeh kijtovah: “Ne nipovi ivan Pedro”. Iva oksekimeh kijtovah: “Ne nipovi ivan Cristo.” ¹³¿Inkiyejyekovah ke Cristo

xexelitok? ¿Kox yen Pablo okikrusifikaroykeh por imejvah? ¿O noso onmobaubautisaroykeh imejvah ika itoka in Pablo? ¹⁴Niktlasojkama-chilia in toYejwatzi porke amika de imejvah onikbautisaro, sino san yen Crispo ivan Gayo. ¹⁵Ijkó amika velis kijtos ke omobaubautisaro ika notoka. ¹⁶Noijki onikinbautisaro tlen de ikalijtik in Estéfanas, pero amo nikilnamiki kox íkka oksé onikbautisaro. ¹⁷Pos Cristo amo onechtitlanki para ma nitlabautisaro, sino ma nitetlapovi de tlen yankuik kuali tlajtoli, iva amo ika tlamatilitlajtoli, para ke imikilis in Cristo itech krus amo ma kipolo ivelitilis.

**Cristo yen ivelitilis iva
itlamatilis in toYejwatzi**

¹⁸In tlapovalistli de imikilis in Cristo itech krus, yejón kittah kemi oyeskia se tontojyotl para nekateh tlen yavíh kan teixpolojka. Pero para tejavah tlen yotikajsikeh nemakixtilistli, yejón tlapovalistli yen ivelitilis in toYejwatzi. ¹⁹Kemi kijtova in Tiotlajkuiloli:

Nikinmijtlakolis
inmixtlamachilis tlen
ixtlamatkeh,
iva nikchivas ayakmitla ma
kajsikamatikah tlen wel
kimatih.

²⁰Tonses, ¿kanin kateh tlen ixtlamatkeh o noso tlen tlamachtijkeh, o noso tlen kijtovah wel kimatih miek tlamantih de nin tlaltikpaktli? In toYejwatzi okikuapki se tontojyotl inmixtlamachilis in tlaltikpaktla-

kah. ²¹In toYejwatzi ika itlamatilis, okichi ke in tlaltikpaktlakah amo ma kixmatikah ika inmixtlamachilis, sino Ye okipakti kinmakixtis tlen kineltokah tlen tejavah titetlapoviah, tlen oksekimeh kittah kemi se tontojyotl.

²²Para kineltokaskeh tlen tite-tlapoviah, in judiojtih kinekih kinmitaskeh tetzavkaneskayomeh, iva tlen griegojtih kinekih kikakiskeh itla tlen ma kipia ixtlamachilistli. ²³Pero tejavah titetlapoviah de Cristo tlen okikrusifikaroykeh. Nin tlapovalistli in judiojtih kinkualania, iva tlen amo judiojtih kittah kemi se tontojyotl. ²⁴Pero para tlen toYejwatzi okinnotzki, judiojtih o noso amo judiojtih, Cristo yen ivelitilis iva itlamatilis in toYejwatzi. ²⁵Porke tlen tlaltikpaktlakah kittah kemi oyeskia se tontojyotl tlen de toYejwatzi, yejón okachi kipia ixtlamachilistli ke inmixtlamachilis in tlaltikpaktlakah. Iva tlen tlaltikpaktlakah kittah kemi amo chikavak tlen de toYejwatzi, yejón okachi chikavak ke inchikavalis in tlaltikpaktlakah. ²⁶Noknivah, xikilnamikikah akinmeh omonkatkah imejavah ijkuak toYejwatzi omechnotzki. Ijkó kemi kittah in tlaltikpaktlakah, san sekimeh de imejavah onkatkah inmixtlamatkeh, san sekimeh de imejavah onkatkah intekivajkeh o noso onpoviah de familias tlen wejweititokeh. ²⁷Pero, toYejwatzi okinpejpenki tlen itech nin tlaltikpaktli kinmitah kemi tontojtih, para kinpijpinatis

tlen ixtlamatkeh. Iva okinpejpenki tlen itech nin tlaltikpaktli kinmitah kemi amo chikavakeh, para kinpijpinatis tlen chikavakeh. ²⁸In toYejwatzi okinpejpenki tlen itech nin tlaltikpaktli amo wejweititokeh, tlen amo kinnekih iva tlen amitla inpati. Ye okinpejpenki ninmeh para kikuapas amitla ipati tlen tlaltikpaktlakah kiyejyekovah weititok. ²⁹Iva ijkó amika velis moweinekis ixpan toYejwatzi. ³⁰Inevia in toYejwatzi omechsetili ivan Cristo Jesús. In toYejwatzi okichi ke yen Cristo ma yeto totlamatilis. Por yen Cristo, in toYejwatzi techitta titlakamelajkeh, otechtotonki de imak in tlajtlakoli iva okichi ma tiekah de Ye igentejvah. ³¹Iva ijkó, kemi kijtova in Tiotlajkuiloli: “Tla íkka kineki moweinekis, ma moweineki por tlen toTeko okichi.”

Tlapovalistli de imikilis in Cristo itech krus

2 ¹Noknivah, ijkuak ne onivia onimechmatiltito in melajkayotl de toYejwatzi tlen achto amika okimatia, ne amo onimechtlapovi ika wei ixtlamachilistli iva nion ika kuajkuali tlajtoli. ²Iva ijkuak onikatka inmovah, onikijto amo nimechtlapovis de itla oksé tlamantli, sino san yen tlen de Jesucristo, iva okachi yen de imikilis itech krus. ³Ijkuak onajsito inmonavak amo onikpiaya chikavalistli iva oniviokaya de mavilistli. ⁴Iva ijkuak onimechmacti iva onimechtlapovi, amo oniknejneki ixtlamachilisttlajtoli de nin tlaltikpaktli para

nimechtlaneltokitis, sino ne onikavili yen Tioijyotzintli ma imechititi ivelitilis iva ma imechtlaneltokiti. ⁵Para ijkó imotlaneltokalis amo ma mokitzkijto itech inmixtlamachilis in tlaltikpaktlakah, sino itech ivelitilis in toYejwatzi.

Tlamatilis de toYejwatzi

⁶Pero innavak tlen yochijchikavakeh itech intlaneltokalis, titlapovah ika ixtlamachilistli. Pero amo ika ixtlamachilistli de nin tlaltikpaktli, nion ika inmixtlamachilis in tlatlanavatijkeh de nin tlaltikpaktli, tlen se tonali poliviskeh. ⁷Tejvah titlapovah de itlamatilis in toYejwatzi tlen achto amika okimatia, tlen otlaatitoka desde ijkuak ayamo okatka in tlaltikpaktli, iva toYejwatzi okijto kinejnekis yejón tlamatilis para ma tipovikah itech imavissotlanex. ⁸Iva nion se de tlen tlatlanavatijkeh de nin tlaltikpaktli amo ovelik okajsikama yejón tlamatilis. Tla okajsikamatiskiah, amo okikrusifikaroskiah in toTeko tlen kipia mavissotlanextli. ⁹Kemi kijtova in Tiotlajkuiloli:

In toYejwatzi okiyehtlali
para tlen kitlasojtlah, seki
tlamantli tlen nion íkka amo
semi kitta iva nion íkka amo
semi kikaki,
iva nion sikiera amo íkka semi
kiyejyekova.

¹⁰Yejvah ninmeh tlamantih tlen toYejwatzi otechinnextili ika iTioijyotzi, porke in Tioijyotzintli nochi veli kiyehtitia iva techititia asta yen

tlamantih tlen toYejwatzi kinpixtok itech iyolo.

¹¹Amika veli kimati tlán kiyejyekova íkka oksé tlakatl, sino san yen tlakatl kimati tlán kiyejyekova. Ijkó noijki, san yen iTioijyotzi in toYejwatzi kimati tlán kiyejyekova in toYejwatzi. ¹²Iva tejavah amo tlayejyekovah kemi tlayejyekovah in tlaltikpaktlakah, sino toYejwatzi otechtitlanili iTioijyotzi, para ma tikajsikamatikah tlen toYejwatzi ika iiknomachilis otechtliokoli. ¹³Ijkuak titlapovah, amo tikinnejekih in tlajtoltih tlen vitz de itech inmixtlamachilis in tlaltikpaktlakah, sino tikinnejekih in tlajtoltih tlen techmachtia in Tioijyotzintli. Tikinnejekih in tlajtoltih de Tioijyotzintli para tikteajsikamatiltiah in tlamantih de Tioijyotzintli.

¹⁴Pero tlen amo kipia iTioijyotzi in toYejwatzi, amo veli kinselia in tlamantih tlen vitz de yen Tioijyotzintli, porke para ye kitta kemi oyeskia se tontojyotl. Iva nion amo veli kinmajsikamati yejonmeh tlamantih porke amo kipia in Tioijyotzintli para velis kajsikamatis. ¹⁵Se tlen kipia iTioijyotzi in toYejwatzi veli kajsikamati nochi tlamantli kox kuali o noso amo kuali, pero se tlen amo kipia iTioijyotzi in toYejwatzi, mach velis kijtos kox kuali o noso amo kuali tlen kichiva se tlen kipia iTioijyotzi in toYejwatzi. ¹⁶Porke in Tiotlajkuiloli kijtova: “¿Akin kixmati itlayejyekol in toTeko? ¿Akin velis kimachtis?” Pero tejavah tikpiah iTioijyotzi in toYejwatzi, iva por eso tikyejyekovah kemi Cristo.

Parejo titekipanojkeh inavak toYejwatzi

3 ¹Noknivah, ne amo ovelik onimechtlapovi kemi onikin-tlapoviskia tlen yi chikavakeh itech Tioijyotzintli, sino kemi tlen ok kin-yakana intlaltikpaktlanekilis o noso kemi oyeskia ok inkonemeh inavak Cristo. ²Ne onimechmachi tlen amo ovi, ijko kemi se konetl tlen ok koni lechi porke ayamo veli kikua itla tlakuali, porke imejavah ayamo onkatkah listos para inkinmajsikamatiskeh in tlamantih tlen okachi ovijitokeh. Iva asta axka ayamo inkateh listos, ³porke ok imechnavatijtok imotlaltikpaktlanekilis. Inkipiah chavalistli se ivan oksé iva inkimomagah entre imejavah. Yejón kiteititia ke ok imechyakana imotlaltikpaktlanekilis iva ok inkichivah kemi tlen oksekimeh tlaltikpaktlakah. ⁴Porke ijkuak se de imejavah kijtova: “Ne nipovi ivan Pablo”, iva oksé kijtova: “Ne nipovi ivan Apolos.” Ijkuak ijko inkijtovah, kijtosneki ke ok imechyakana imotlaltikpaktlanekilis.

⁵Pos, ¿tlán ipati in Pablo? ¿Tlán ipati in Apolos? Tejavah san titekipanojkeh de toYejwatzi tlen otimechpalevijkeh para ontlaneltokakeh inavak Jesucristo. Kada se de tejavah otikchijkeh tlen toTeko otechnavati ma tikchivakah. ⁶Ne oniktookak in semiya, Apolos okajvili, pero yen toYejwatzi okiskalti. ⁷Ijko pues, nion tlen kitooka in semiya iva nion tlen kajvilia, amitla inpati, sino yen toYejwatzi tlen

kichiva ma moskalti tlen se kitooka. ⁸Tlen kitooka in semiya iva tlen kajvilia, toYejwatzi kinmita san se parejo. Iva kada se de yevjah kiselis itlaxtlavil ijkó kemi otekipoanjkeh. ⁹Apolos ivan ne san sekka titekipanovah itech itekiv in toYejwatzi, iva imejvah inkateh kemi itlala in toYejwatzi kan tooka, o noso kemi se kali tlen toYejwatzi kichijtok.

¹⁰Ika iknomachilistli tlen toYejwatzi onechmakak, ne oniktlali in tlaxitlanyotl kemi oyeskia yi neli nikmati nikalchi. Axka oksekimeh kiskaltiah in kali ipan yejón tlaxitlanyotl. Pero kada se ma kipia kuidado kenik kiskaltia in kali. ¹¹Pos amika velis kitlalis oksé tlaxitlanyotl ke tlen yi kajki, iva yejón tlaxitlanyotl yen Jesucristo. ¹²Itech yejón tlaxitlanyotl velis kiskaltis-keh se kali ika oro, ika plata, ika temeh kualtitzintih, ika kuavitl, ika akatl o noso ika sakatl. ¹³Pero ajsis tonali in toYejwatzi kiyeyjekos totekiv ika tlitl para kittas tlán tlamantli tekittl tlen otikchijkeh. Iva ika tlitl moteititis in totekiv kox itla ipati o noso amo. ¹⁴Tla íkka itekiv tlen okichi kixikos in tlitl, kiselis itlaxtlavil. ¹⁵Pero tla íkka tlatlas itekiv tlen okichi, kipolos itlaxtlavil, maski ye momakixtis kemi tlen cholova de ijtik tlitl.

¹⁶¿Kox amo inkimatih ke imejvah inmochijtokeh itemplo in toYejwatzi, iva iTioijyotzi in toYejwatzi chanti inmotech? ¹⁷Tla íkka kixpolos itemplo in toYejwatzi, in toYejwatzi noijki kixpolos tlen ijkó kichivas, porke itemplo in toYej-

watzi chipavak, iva yejón templo yen imejvah.

¹⁸Amika ma mokajkayava. Tla íkka de imejvah momachilia kipia ixtlamachilistli itech nin tlaltikpaktli, ma mochiva kemi oyeskia amitla kimati, iva ijkó yi neli mochivas ixtlamatki. ¹⁹Porke in ixtlamachilistli de nin tlaltikpaktli yejón puro tontojyotl para toYejwatzi. Kemi kijtova in Tiotlajkuiloli: “In toYejwatzi kichiva ke in ixtlamatkeh ma motrampajvikah ika inmixtlamachilis.” ²⁰In Tiotlajkuiloli noijki kijtova: “In toYejwatzi kimati ke intlayeyjekol in ixtlamatkeh yejón puro tontojyotl.” ²¹Por eso, amika ma moweineki por kiséguirova se tlaltikpaktlakatl, porke nochi tlamantli imejvah inmoaxka, ²²yetos Pablo, Apolos, Pedro, tlaltikpaktli, nemilistli, mikilistli, tlen axka onka o noso tlen satepa yetos. Nochi inmoaxka, ²³iva imejvah inteaxkavah de Cristo, iva Cristo iaxka in toYejwatzi.

Intekiv in tiotlatitlaniltih

4 ¹Imejvah moneki xitechitakah nik san titekipanojkeh de Cristo, iva otechtekimakakeh ma tiktematiltikah tlen melajkayotl de toYejwatzi tlen achto amika okimatia. ²Axka, moneki kada se tlen okitekimakakeh ma kiteititi nik yi neli tenmachtli. ³Ne amo nechtekipachova tla imejvah o noso íkka tlaltikpaktekiva kijtos kox kuali tlen nikchiva o noso amo. Nion ne amo velis nikijtos kox kuali o amo kuali notekiv tlen nikchiva. ⁴Iva maski notzonteko amo nechtlajtlakoltia

de itla, ika yejón amo kijtosneki ke yi neli kuali nika. Pero tlen kijtos kox kuali tlen nikchiva o noso amo yen toTeko. ⁵Por eso, amo xitlajtokah de íkka kox kuali tlen kichiva o noso amo, xikchiakah ma ejko in tonali ijkuak valmuikas in toTeko. Ijkuakó Ye kinextis kan tlanextli nochi tlamantli tlen axka tlaatitok kan tlayova, iva kinextis tlen se kiyeyjekova itech se iyolo. Ijkuakó, toYejwatzi kimakas weijkachivalistli kada se tlen itech povi.

⁶Noknivah, nin tlamantli tlen nimechtlapovia se kuali para imejvah iva niktlalia kemi ejemplo in Apolos ivan ne, para amo xiviah okachi nepa de tlen yi kajki ijkuilitok, iva amo xikinichikotepovakah tlen kitekipanovah in toYejwatzi. ⁷Pos, ¿akin kijtova ke te okachi timejor ke oksekimeh? ¿Amo yen toYejwatzi omitzmakak nochi tlen tikpia? Iva tla yen toYejwatzi omitzmakak, ¿tleka timoweineki kemi oyeskia te mismo otikmotemoli?

⁸Imejvah inkiyeyjekovah yinkipiah nochi tlen inkinekih. Inmomachiliah yintominejkeh, iva yope intlanavatiah kemi inwejwei tlanavatijkeh iva amo inkinekih totlapalevilis. Kuali oyeskia tla yi neli onyeskiah inwejwei tlanavatijkeh para ijko noijki inmovah otitlanavatiskiah. ⁹Nikitta tejavah tlen titiotlatitlaniltih, in toYejwatzi otechtlati asta sa tlakuitlapa, kemi tlen yi kateh para kinmixpoloskeh. Yotimochijkeh kemi tlamavisoli para in tlaltikpaktli, para in ilvikaktlatitlaniltih iva para in

tlaltikpaktlakah. ¹⁰Tejavah por titlaneltokah inavak Cristo, in gentejtih techittah kemi titontojtih, pero imejavah por yen Cristo imechittah kemi inmixtlatmatkeh. Tejavah amo tichikavakeh, iva imejavah inchikavakeh. Imejvah imechtlakitah, iva tejavah amo techitasnekiah. ¹¹Asta axka amo tikpiah tlán tikuaskeh, tlán tikoniskeh iva techpolova toztotzol. In gentejtih techtlatlamotlah iva amo tikpiah tokalijtik. ¹²Timosotlavitiah titekivanovah iva tomavah. Tikintiochivah tlen fiero techpoviliah. Ijkuak san tlen amo techtoktiah, tejavah tikxikovah. ¹³Ijkuak fiero techpoviliah, tejavah tikinyeknotzah. Asta axka, techitah kemi itla tlen yoiytlakavik, kemi tlajsoli tlen tlaltikpaktlakah kichapaniah.

¹⁴Amo nimechijkuuililia nin tlamantli para ika nimechpijpinatis, sino para ika nimechnajnavatis kemi oyeskia innotlasojkapilvah. ¹⁵Maski imejavah xikinpiakah majtlaktli mil tlen ma imechmachtikah de Cristo, amo inkinpiah miekeh inmotajvah. San yen ne tlen nika kemi niteta de imejavah, porke ne onimechmatilti in yankuik kuali tlajtoli para ijko onpovikeh inavak Cristo Jesús. ¹⁶Ijko pues, nimechtlatlavtia xikchivakah ijko kemi tlen notech inkittah.

¹⁷Ika onimechtitlanili in Timoteo, tlen inavak Cristo, kajki kemi oyeskia notlasojkone iva tlen veli nimotenmachia inavak. Ye imechilnamiktis kenik ninemi kemi nitlaneltokah inavak Cristo. Nin tlamantli tlen kenik moneki se nemis yen yejón tlen nitlamachtia innavak

in olololistih de tlaneltokakeh ik sentetl. ¹⁸ Sekimeh de imejvah yonmoweinekeh, iva inkiyejyekovah amo keman nias nimechitati. ¹⁹ Pero, tla toTeko kimonekiltis, nikchia san niman nias nimechitati. Iva ijkuakó nikittas kox yi neli kichivah tlen kijtovah yejonmeh tlen moweinekeh, o noso san por tlapovah. ²⁰ Ijkuak íkka povi kan Dios tlanavatia, amo kiteititia san ika itlajtol sino ika ivelitilis in Dios. ²¹ ¿Tlán inkinekih? ¿Inkinekih ma najsiiti omonavak ika tlakotl, o noso ika tlasojtlalistli iva ika tlajtolyamanilistli?

Se tlamantli de avilnemilistli

5 ¹ Yomomatki ke se de imejvah itlakpana yokichi kemi oyeskia itonana. Yejón tlamantli de avilnemilistli sa tlawel fiero, nion tlen amo kixmatih Dios amo ijko kichivah. ² ¡Iva imejvah yej inmoweinekih! ¡Omonekia onmoykokoskiah! In tlakatl tlen okichi yejón tlajtlakoli omonekia onkikixtiskiah de inmonavak. ³ Maski ne amo ompa nika inmovah, pero ika notonal ompa nika. Ne nikijtova ke yejón tlakatl yi neli tlajtlakole tlen ijko okichi, iva ijki nikijtova kemi oyeskia ompa nika inmovah. ⁴ Ijkuak inmololoskeh ika itoka in toTeko Jesucristo, ne nietos inmovah ika notonal. Iva ivelitilis in toTeko Jesucristo yetos inmovah. ⁵ Ijkuakó yejón tlakatl moneki xikmaktilikah in Amo Quali Tlakatl. Iva ijko, maski in Amo Quali Tlakatl ma kixpolili ikuerpo, itonal momakixtis ijkuak vamuikas in toTeko Jesús.

⁶ Inmoweinekilis yi neli amo kuali. ¿Amo inkimatih ke ika tzikitzi xokotixtli kisamava nochi in tixtli? ⁷ Xikixtikah de inmonavak tlen yowejka xokotixtli tlen imechijtlakova, para xiekah kemi in pan tlen tlachivali ika yanjkuik tixtli. Imejvah inkateh kemi in pan tlen amo kipia xokotixtli tlen mokua itech ilvitl de Pascua. Porke Cristo okixpolojkeh por tejvah ijko kemi ijkuak okimixtiayah se ichkakonetl itech ilvitl de Pascua. ⁸ Tonses ma tikchivakah in ilvitl de Pascua, pero amo ika pan tlen kipia in yowejka xokotixtli, porke yejón yen xokotixtli de tlajtlakoli iva de tlen amo kuali. Okachi kuali ma tikchivakah in ilvitl ika pan tlen amo kipia xokotixtli, kijtosneki ipan melajka iva ika tlen yi neli.

⁹ Itech oksé noamatlajkuilol onimechilvi amo invah ximonelokah tlen avilnemih. ¹⁰ Pero tlen onimechilvi amo kijtosneki seppa ximoxelokah de invan nochtin gentejtih de nin tlaltikpaktli tlen avilnemih, tlen tlaixnekeh, tlen ichtekeh o noso tlen kinmavistilia diosmeh tlen tlamachivaltih. Porke para ijko omonekiskia inkisakeh de itech nin tlaltikpaktli. ¹¹ Tlen oniknekki nikijtos, yen amo ximonelokah ivan se tlen moteneva tokni tlaneltokak iva avilnemi, tlaixneki, kinmavistilia diosmeh tlen tlamachivaltih, fiero kitepovilia, tlavanki o noso ichtekki. Se tlen ijko kichiva nion sikiera amo ivan xitlakuakah. ¹²⁻¹³ Amo ne nechtokarova nikijtos kox kuali o noso amo kuali tlen kichivah tlen amo kixmatih Dios.

Yen Dios kijtos kox kuali o noso amo kuali tlen kichivah. Pero innavak tlen tlaneltokakeh yejón imejvah moneki inkittaskeh kox kuali o noso amo kuali tlen kichivah. Por eso, xixixtikah de inmonavak yejón tlajtlakole.

**Amo ximoteixpantijtjinemikah
innavak juesmeh amo
tlaneltokakeh**

6 ¹Ijkuak se de imejvah itla ik mokualania ivan oksé ikni tlaneltokak, amo ma via innavak juesmeh tlen amo kixmatih Dios. Okachi kuali ma via innavak toknivah tlen tlaneltokakeh. ²¿Amo inkimatih ke tlen iaxkavah in toYejwatzi yejvah kijtoskeh kox tlajtlakolejkeh o noso amo tlen kateh itech ilvikak iva tlen kateh itech taltikpaktli? Iva tla imejvah ijko inkichivaskeh, tonses, ¿kenik amo velis inkiyektlaliskesh se tlamantli tzikitzi? ³¿Amo inkimatih ke asta in ilvikaktlatitlaniltih tejvah tikijtoskeh kox tlajtlakolejkeh o noso amo? Tla ijko, ¿kenik amo ma veli ma tikyektlalikah itla tlen techpanova itech nin taltikpaktli? ⁴Ijkuak imejvah inkipiah de inkiyektlaliskesh itla tlamantli, ¿tleka yej inyavih inkinmitativih in juesmeh tlen amo povih invan tlaneltokakeh? ⁵Ijki nimechilvia para xipinavakah. ¿Ke amo onka entre imejvah nion se tokni tlayejyekole tlen ma veli ma kiyektlali tlen ika mokualaniah in tlaneltokakeh? ⁶Pero imejvah amo san inmokualaniah se ivan oksé, sino asta inyavih inmoteilvitivih

innavak juesmeh tlen amo tlaneltokakeh.

⁷Tla san mismo imejvah inmojtejteilviah san ika yejón yi motta nik intlapolojtokeh. Okachi kuali xixixikokah ijkuak imechtoktiah itla tlen amo kuali, iva noijki xixixikokah ijkuak itla imechkuuliah tlen inmoaxka. ⁸Pero imejvah asta mismo inmoknivah tlaneltokakeh inkintoktiah tlen amo kuali iva inkinkuuliah itla tlen inmaxka.

⁹⁻¹⁰¿Amo inkimatih ke tlen kichivah tlen amo kuali amo kalakiskesh kan Dios tlanavatia? ¿Amo ximokajkayavakah! Amo kalakiskesh kan Dios tlanavatia tlen avilnemih, tlen kinmavistiliah in diosmeh tlen tlamachivaltih, tlen avilnemih invan tlen amo invah tlanamiktlih, tlen kuiltemeh, tlen tlachtekih, tlen tlaixnekeh, tlen tlanvankeh, tlen fiero kitepoviliah iva tlen tlachtekih ika tlakajkayavalistli. ¹¹Sekimeh de imejvah ijko nik onkatkah. Pero axka toYejwatzi yomechpajpaki, yonmochijkeh iaxkavah iva yimechitta intlakamelajkeh ika itoka in toTeko Jesucristo iva ika iTioijyotzi in toYejwatzi.

Xikcholilikah in avilnemilistli

¹²Sekimeh kijtovah: “Velis nikchivas san tlan ne niknekis.” Yejón yi neli, pero amo nochi tepalevi. Velis nikchivas san tlan ne niknekis, pero amo nikmokavilis ma nechtlani itla. ¹³Noijki kijtovah: “In tlakuali omochi para totlalix iva totlalix omochi para yen tlakuali.” Yejón

yi neli, pero toYejwatzi kinpopolos nochtin yejonmeh ome tlamantih. Pero in tokuerpo amo omochi para ika ma se avilnemi, sino omochi para yen toTeko, iva toTeko para yen tokuerpo. ¹⁴Iva ijkó kemi toYejwatzi okiyoliti in toTeko, tejavah noijki ijkó techyolitis ika ivelitilis.

¹⁵¿Amo inkimatih ke inmokuervo povi itech ikuerpo in Cristo? Tla ijkó, ¿kox kuali niktlanas tlen povi itech ikuerpo in Cristo iva niksetilis ivan ikuerpo se avilsivatl? ¿Pos amo! ¹⁶¿Amo inkimatih ke ijkuak se tlakatl mokalakia ivan se avilsivatl mochiva sa se kuerpo? Porke in Tiotlajkuiloli kijtova: “De omeh mochivas sa se kuerpo.” ¹⁷Pero ijkuak íkka mosetilia ivan toTeko, mochiva sa se ivan Ye itech Tioijyotzintli.

¹⁸Xikcholilikah in avilnemilistli. Tlen okseki tlamantli tlajtlakoli tlen íkka kichiva, amo kijtlakova ikuerpo. Pero tlen avilnemi, inevia kijtlakova ikuerpo ika tlajtlakoli. ¹⁹¿Amo inkimatih ke inmokuervo mochitok yen itemplo in Tioijyotzintli tlen toYejwatzi omechmakak, iva in Tioijyotzintli chanti inmo-tech? Tonses, inmokuervo amo inmoaxka. ²⁰Imejvah sa tlawel patío nik omechko in toYejwatzi. Por eso, moneki xikmakakah tetlakitalistli in toYejwatzi ika inmokuervo iva ika inmotonal, porke yejón ome tlamantli iaxka in toYejwatzi.

Kenik moneki yeskeh tlen tlanamiktih

7 ¹Axka, nimechnankilis de yen tlen ontechtlajtlanijkeh itech

inmoamatlajkuilol. Kuali oyeskia tla se tlakatl amo okipiaskia itonana. ²Pero para amo se vetzis itech avilnemilistli, okachi kuali kada se tlakatl ma motonananti, iva kada se sivatl ma mototatati. ³In totata moneki kochis san ivan itonana, iva in tonana moneki kochis san ivan itotata. ⁴In tonana ayakmo yen tlanavatia itech ikuerpo, sino yen itotata. Noijki in totata ayakmo yen tlanavatia itech ikuerpo, sino yen itonana. ⁵Por eso, amo ma monenekikah de sepankochiskeh, solamente tla ik motlapoviskeh nochtin omeh de amo sepankochiskeh kana keski tonali para motemaktiskeh itech diostzajtzilistli. Pero satepa moneki oksejpa ma sepankochikah para ijkó in Amo Kuali Tlakatl amo kintlajtlakolchivaltis por amo veli motlakavaltiah.

⁶Amo kijtosneki nimechnavatia ijkó xikchivakah, sino ne nimechilvia velis ijkó inkichivaskeh tla imejavah inkinekih. ⁷Ne oniknekiskia ke nochtin ma yekah inselti kemin ne, pero kada se toYejwatzi yokimakak tlatlamantli velitilistli, sekimeh de se tlamantli, iva oksekimeh de oksé tlamantli.

⁸Tlen ayamo monamiktiah iva tlen iknosivameh, ne nikneki nikinmilvis ke okachi kuali oyeskia ma mokavakah inselti kemin ne. ⁹Pero tla amo veli motlakavaltiah, okachi kuali ma monamiktikah. Porke okachi kuali ma monamiktikah ke ma motlatijtakah ika ilevilistli.

¹⁰Pero tlen yomonamiktijkeh ninmaka nin tlanavatili, amo de

ne, sino de toTeko: In tonana amo ma kikajkava itotata. ¹¹ Pero tla in tonana kikajkava itotata, ayakmo ma monamikti, o noso ma motlapojpolvi ivan itotata. Ijkó noijki, in totata amo ma kikajkava itonana.

¹² Tlen oksekimeh, ne nikinmilvia, amo toTeko: Tla se tlakatl tlaneltokak omonamikti ivan se sivatl amo tlaneltokak iva yejón sivatl kineki ivan yetos, in tlakatl amo ma kikajkava. ¹³ Iva tla se sivatl tlaneltokak kipia itotata amo tlaneltokak iva yejón tlakatl kineki ivan yetos, in sivatl amo ma kikajkava. ¹⁴ Porke in totata amo tlaneltokak, velis povis invan tlen toYejwatzi iaxkavah, tla setitos ivan itonana tlaneltokak. Iva in tonana amo tlaneltokak, velis povis invan tlen toYejwatzi iaxkavah, tla setitos ivan itotata tlaneltokak. Iva tlen inpilvah, in toYejwatzi velis kinselis kemi iaxkavah, iva amo kintlalis sekka kemi oyeskia amo chipavakeh. ¹⁵ Pero tla in tlakatl o noso in sivatl tlen amo tlaneltokak kineki mokajkavas, tonses ma mokajkava. Ijkó, in tokni tlaneltokak, tlakatl o noso sivatl, ayakmo ilpitok ivan itotata o noso ivan itonana, porke toYejwatzi kineki ma se yeto ika yolvevistli. ¹⁶ ¿Ken tikmati te sivatl ke velis tikpalevis ma momakixti mototata? O noso, ¿ken tikmati te tlakatl ke velis tikpalevis ma momakixti motonana?

¹⁷ Kada se ma kinemili in nemilistli tlen toTeko okimakak, iva ma mokava ijkó kemi okatka ijkuak toYejwatzi okinotzki. Yen nin tlanavatili tlen ne nikinmaka in

tlaneltokakeh ik sentetl. ¹⁸ Tla íkka okatka sirkunsidado ijkuak toYejwatzi okinotzki, amo ma kitlaati. Iva tla íkka amo okatka sirkunsidado ijkuak toYejwatzi okinotzki, amo ma mosirkunsidaro. ¹⁹ Tla se yetos sirkunsidado o noso amo, yejón amitla kijtosneki. Tlen yi neli wei kijtosneki yen tla se kivelkakis itlanavatil in toYejwatzi. ²⁰ Kada se ma mokava ijkó kemi okatka ijkuak toYejwatzi okinotzki. ²¹ Tla otikatka titlakatlakovali ijkuak toYejwatzi omitznotzki, amo ximotekipacho. Pero tla tikitta velis tikisas temak, xiktemoli ken tikchivas. ²² Porke tlen okatka tlakatlakovali ijkuak toTeko okinotzki, axka yi kajkatok para kitekipanos toTeko. Ijkó noijki, tlen amo okatka tlakatlakovali ijkuak toTeko okinotzki, axka mochiva tlakatlakovali de Cristo. ²³ In toYejwatzi sa tlawel patío nik omechko. Por eso, amo ma imechpiakah kemi intlakatlakovaltih in tlaltikpaktlakah. ²⁴ Noknivah, kada se ma mokava ijkó kemi okatka ijkuak toYejwatzi okinotzki.

²⁵ Para tlen ayamo monamiktiah, amo nikpia itla tlanavatili de toTeko para nikinmilvis. Pero nikinmilvis tlen ne nikyejyekova, iva velis motenmachiskeh nonavak por yen iiknomachilis in toTeko tlen onechmakak. ²⁶ Ne nikyejyekova okachi kuali ke kada se ma mokava ijkó kemi kajki, porke tikateh itech tonaltih tlen sa tlawel ovijtitokeh. ²⁷ Tla tikpia motonana, amo xikajkava. Tla amo tikpia motonana, amo xiktemo. ²⁸ Tla tikijtos timonamiktis,

amo tlajtlakoli. Iva tla se ichpochtli monamiktia, noijki amo tlajtlakoli. Pero tlen monamiktiah, kipiaskheh miek ovijkayotl itech nin tlaltikpaktli, iva ne oniknekiskia amo ijkó ma kinpano.

²⁹Noknivah, tlen ne nikneki nimechilvis yen nin: Yi tikateh sa ik tlami tonaltih. Por eso, tlen yomonamiktijkeh ma kitekipanokah in toTeko kemi oyeskia ayamo monamiktiah. ³⁰Tlen moyolkokovah ma yekah kemi oyeskia pakih. Tlen pakih ma yekah kemi oyeskia moyolkokovah. Tlen tlakovah ma yekah kemi oyeskia amitla kipiah. ³¹Tlen kichivilijtokeh itech nin tlaltikpaktli ma yekah kemi oyeskia amo kichivilijtokeh. Porke nin tlaltikpaktli tlen axka tikittah ayakmo wejkavas para tlamis.

³²Ne oniknekiskia amo xikpiakah itla netekipacholistli. Se tlakatl tlen ayamo monamiktia motekipachova de kenik kitekipanos in toTeko iva de kenik kipaktis. ³³Pero se tlakatl tlen yomonamikti motekipachova por yen tlamantih de nin tlaltikpaktli iva por yen kenik kipaktis itonana. ³⁴Iva ijkó kipia de kiyeyjekos ome tlamantli, kipaktis itonana iva kipaktis in toTeko. Ijkó noijki, in sivatl tlen ayakmo kipia itotata o noso in ichpochtli tlen ayamo monamiktia motekipachova por kenik kitekipanos in toTeko, por kenik yetos chipavak itech ikuerpo iva itech itonal. Pero se sivatl tlen yomonamikti motekipachova por yen tlamantih de nin tlaltikpaktli iva por yen kenik kipaktis itotata.

³⁵Nochi nin tlen nimechilvia yejón se kuali para imejvah, amo para nimechtatzakuulis, sino para xiekah kuali kemi moneki iva amitla ma imechtzakuili para inkitekipanoskeh in toTeko.

³⁶Tla se tlakatl kipia ichpoch iva kiyeyjekova amo yompa tlen kichiva kemi teta porke amo kikavilia ma monamikti, tonses ma kichiva tlen ye kittas kuali. Iva tla yejón ichpoch yochikavak iva se telpochtli kineki monamiktis iva, tonses ma monamiktikah. Amo tlajtlakoli tla in teta kinkavilis ma monamiktikah. ³⁷Pero tla íkka teta kuali yokiyejeko, iva amika kichikavilia, sino ye monavatia, iva ik yokitlali ke ichpoch ma mokava iselti, yejón kuali tlen kichiva. ³⁸Ijkó pues, tlen kitemaka ichpoch ma monamikti, kuali tlen kichiva, pero okachi kuali kichiva tlen amo kitemaka ichpoch ma monamikti.

³⁹In sivatl tlen tlanamiktli ilpitok ivan itotata mientras itotata ok onka. Pero tla itotata ixpolivi, in sivatl velis monamiktis san akin ivan ye kinekis, pero ma yeto ivan se tlen tlaneltokak inavak toTeko. ⁴⁰Pero, ne nikitta ke okachi kipiaskipalistli tla ayakmo monamiktis. Ne ijkí nikyejekova, iva niknelto-ka ke ne noijki nikpia iTioijyotzi in toYejwatzi.

Tlakuali tlen kinmaniliah in diosmeh tlen tlamachivaltih

8 ¹Axka nimechilvis de yen tlakuali tlen kinmaniliah in diosmeh tlen tlamachivaltih. Ti-

nochtin tejavah tikpiah ixtlamatistli de yejón tlamantli. Pero in ixtlamatistli kichiva ma se moweineki, pero in tlasojtlistli techiskaltia itech tlaneltokalistli. ²Tla íkka kiyeyekova ke yi kimati itla, kijtosneki ayamo kimati kemi moneki kimatis. ³Pero tla íkka kitlasojtla in toYejwatzi, in toYejwatzi noijki kixmati akin ye.


⁴Iva tla kox kuali o noso amo kuali tla se kikuas in tlakuali tlen kinmaniliah in diosmeh tlen tlamachivaltih, kuali tikmatih ke amitla inpati itech nin taltikpaktli, iva kuali tikmatih nik onka san se Dios. ⁵Pos maski ma yekah itech ilvikak iva itech taltikpaktli tlen kintenevah diosmeh, iva sekimeh kinmavistiliah miekeh diosmeh iva miekeh tetekomeh, ⁶pero tejavah tikmatih nik onka san se Dios, yen toTajtzin Dios, tlen okichi nochi tlen onka, iva tiyolitokeh para Ye. Iva onka san se toTeko, yen Jesucristo. In toYejwatzi okichi nochi tlen onka por yen Jesucristo, iva por Ye tejavah tikpiah nemilistli.

⁷Pero amo nochtin kimatih nin tlamantli. Sekimeh antes de otlaneltokaskiah inavak Cristo, okinmavistiliayah diosmeh tlen tlamachivaltih, iva ok kineltokah ke yejonmeh diosmeh kipiah nemilistli. Por eso, ijkuak kikuah in tlakuali tlen okinmanilijkah yejonmeh diosmeh, fiero kimachiliah itech intzonteko iva kiyeyekovah ke yotlajtlakolchijkeh. ⁸In tlakuali mach techpalevia para ma tiekah okachi kuali inavak toYejwatzi. Mach

tieskeh okachi tikuajkualtih ke oksekimeh por tikuaskeh, niompor amo tieskeh okachi amo tikuajkualtih por amo tikuaskeh. ⁹Pero, maski imejavah velis inkikuaskeh de nochi tlakuali, xikpiakah kuidado de amo inkintoktiskeh ma vetzikh itech tlajtlakoli tlen amo chikavakeh itech intlaneltokalis. ¹⁰Porke tla te, tlen okachi yi tikmati yejón tlamantli, timotlalis titlakuas kan itiopa se dios tlen tlamachivali, iva tla mitzitas se tokni tlen amo chikavak itech itlaneltokalis, ijkuakó ye noijki valmoyolchikavas kikuas yejón tlakuali tlen yokimanilijkah se dios. ¹¹Iva ijko, te por okachi tikmati, tikchiva ma mopolo se mokni tlen amo chikavak itech itlaneltokalis, tlen Cristo oixpolivik por ye. ¹²Tla ijko tikchiva, tikchiva tlajtlakoli innavak moknivah, porke tikchiva ma kimachilikah itech intzonteko ke yotlajtlakolchijkeh, iva yejón kijtosneki titlajtlakolchiva inavak Cristo. ¹³Por eso, tla por yen tlakuali tlen nikua nikchiva ma vetzi se nokni itech tlajtlakoli, okachi kuali amo keman nikuas nakatl, para ijko amo nikchivas ma vetzi itech tlajtlakoli.

Tlen itech povi kiselis se tiotlatitlanili

9 ¹Ne amitla nechilpijtok. Ne niotlatitlanili de toYejwatzi. Ne onikittak in toTeko Jesús. Iva tlasojkamati por yen notekiv, axka imejavah inpovih inavak toTeko. ²Maski oksekimeh ma kiyeyekokah ke ne amo niotlatitlanili, imejavah kuali inkimatih nik yi neli, porke



itech imejvah kuali motta notekiv tlen yonikchi kemi nitiotlatitlanili inavak toTeko.

³Tlen nechpojpvah ne nikneki nikinnankilis ijki: ⁴Tejvah totech povi de tikselsekeh tlen tikuaskeh iva tlen tikoniskeh. ⁵Noijki totech povi de tikvikaskeh totonana kan tiavih, ijko kemi kichiva in Pedro iva tlen oksekimeh tiotlatitlaniltih, iva tlen iknivah in toTeko. ⁶¿Kox san ne ivan Bernabé moneki titekipanoskeh para titlakuaskeh? ⁷¿Se soldado kox moneki yej yen ma kixixti itomi para motlatlaxtlavilis? ¿Akin kitooka uvas iva amo ma kikuatlakilo? ¿Akin tlajpixki amo ma koni lechi ijkuak kintlapatzkilia itentzonvah? ⁸Iva amo xikyejyekokah ke nin tlen nimechilvia san ne ijko nikyejyekova kemi nitlaltikpaktlakatl, porke itlanavatil Moisés noijki ijko kijtova. ⁹Itech itlanavatil Moisés kijtova: “Amo xiktlalili itenpuxa in toro ijkuak ipan mokejketza in trigo para kooya.” Iva yejón amo kijtosneki ke toYejwatzi motekipa-

chova por yejvan torojtih, ¹⁰sino motekipachova por tejvah. Porke in tlanavatil omijkuilo para tejvah. Tlen tlaxava iva tlen tlioya, parejo kichiah kiseliskeh itla tlakilotl de tlen kipixkaskeh. ¹¹Ijko noijki, tla tejvah otiktookeh omotech semiya de itlajtol in toYejwatzi, ¿kox melajka miek tiktlajtlanih ma tikpixkakah inmonavak seki tlen ik timopanoltiskeh? ¹²Tla imejvah inkinpaleviah oksekimeh tlen ik mopanoltiah, tejvah okachi totech povi intechpaleviskeh.

Pero tejvah amo tiknekih timechtajtlaniliskeh tlen totech povi, sino tejvah tikxikojtivitzech nochi para amo tiktatzakuuiliskeh in yankuik kuali tlajtoli de Cristo. ¹³Imejvah kuali inkimatih tlen tekipanovah kan templo, mopanoltiah ika tlen onka kan templo. Kijtosneki, tlen tekipanovah kan artal kikuah seki nakatl tlen ompa kimaniliah in toYejwatzi. ¹⁴Ijko noijki, in toTeko otlanavati tlen kitematiltiah in yankuik kuali tlajtoli, de ompa ma

kisa tlen ik mopanoltiskeh por kichivah yejón tekítl. ¹⁵Pero ne amo kema niknejni nochi nin tlamantli maski notech povi, iva nion amo nimechijkuililia nin tlajtoli para itla intechmakakah. ¡Okachi kuali ma nimiki ke ma nikpolo in pakilistli de nitiotlatitlanili tlen amo niktlantok!

¹⁶Ne amo niktematiltia in yankuik kuali tlajtoli para ika nimoweinekis. Nikchiva porke toYejwatzí ijkó onechnavati. ¡Iva prove de ne tla amo niktematiltis! ¹⁷Tla onikchivas-kia nin tekítl por ne nikneki, tonses onikchiasia itla notlaxtlavil. Pero amo nikpia de oksé, kipia tlen niktematiltis in yankuik kuali tlajtoli tlen toYejwatzí yonechnavati. ¹⁸Tonses, notlaxtlavil yen pakilistli por veli niktematiltia in yankuik kuali tlajtoli maski amitla niktlantok. Ika, amo kema niktlahtlani itla tlaxtlavili tlen omonekia nikselis por niktematiltia in yankuik kuali tlajtoli.

¹⁹Maski ne amo nitlakatlakovali de íkka, ne yonimochi kemi nitlakatlakovali de nochtin, para velis nikintlanis okachi miekeh para Cristo. ²⁰Ijkuak nika invan judiojtiñ nimochiva kemi nijudío, para velis nikintlanis para Cristo. Kijtosneki, para tlen kateh imak itlanavatil Moisés, ne nimotlalia imak yejón tlanavati para velis nikintlanis para Cristo, maski ne amo nika imak yejón tlanavati. ²¹Ijkó noijki, para velis nikintlanis tlen amo kateh imak itlanavatil Moisés, nimochiva iwal kemi yejvah, maski ne nika para nikvelkakis itlanavatil in toYejwatzí, porke nika imak itlanavatil

in Cristo. ²²Ijkuak nika invan tlen amo chijchikavakeh itech intlaneltokalis, nimochiva kemi yejvah para velis nikintlanis noijki. Kijtosneki, nimochiva iwal kemi nochtin, para ijkó velis nikipalevis ma momakixtikah sekimeh de yejvah. ²³Nochi yejón nikchiva por yen yankuik kuali tlajtoli, para teva nikselis in tlatiochivalistli tlen kivalika yejón yankuik kuali tlajtoli.

²⁴Imejvah inkimatih ke ijkuak motlatlanih motlelovah, san se in tlatlani iva kimakah itlatliokolil. Ijkó noijki, imejvah ximotleloka iva xikchivakah de xiktlanikah inmotlatliokolil. ²⁵Tlen momamachtiah para motlatlaniskeh itech se avili, kikavah sekka nochi tlen velis kinmijtlakos. Yejvah ijkó kichivah para velis kitlaniskeh se korona tlen amo wejkava. Pero tejevah tikchivah para tiktlaniskeh se korona tlen wejkavas para semijkak. ²⁶Por eso, ne amo nimotlelova kemi oyeskia amo nikmati kan niav, nion amo nitemaga kemi oyeskia nitlamaga san ipan ejekat. ²⁷Yej, niktlayoviltia nokuervo iva nikchikavilia ma nechvelkaki. Porke tla ne yonikinmachtijtenenki oksekimeh, amo nikneki satepa yej ne ma nechkixtikah.

**Nejmachtilistli para amo se
ma kinmavistili in diosmeh
tlen tlamachivaltih**

10 ¹Noknivah, amo nikneki xikilkavakah tlen okinpanok tlen yi wejkavítl tokojkolvah kan tlavaki. Nochtin onejnenkeh itlampa

mixtli tlen okinyakanaya, iva nochtin opanokeh tlatlajko atl tlen wei itoka Chichiltik. ²Iva ijko nochtin omobautisarojkeh itech mixtli iva itech atl tlen wei, iva ijko omochijkeh sa se ivan Moisés. ³Nochtin yevjah okikuajkeh in tlakuali de ilvikak tlen toYejwatzi okinmakak, ⁴iva nochtin okonikeh in atl tlen toYejwatzi okinmakak, porke okonikeh in atl tlen omeyak itech tetl de toYejwatzi tlen invah oyaya. Iva yejón tetl yen Cristo. ⁵Pero kasi nochtin yevjah amo okipaktijkeh in toYejwatzi, iva por eso Ye okinmixpolo iva inkuerpo omokajkeh tilantokeh kan tlavaki.

⁶Nochi yejón tlen opanolok tchititia amo ma tikixnekikah tlen amo kuali, kemi yevjah okixnekeh. ⁷Por eso, amo xikinmavistilikah in diosmeh tlen tlamachivaltih, kemi sekimeh de yevjah ijko okichijkeh, kemi kijtova in Tiotlajkuiloli: “In gentejtih omotlaliykeh otlakuajkeh iva okonikeh, iva satepa omoketzkeh ope mijtotiah.” ⁸Amo ma tiavilnemikah kemi sekimeh de yevjah okichijkeh, iva san ipan se tonali oixpolikeh senpoali ivan eyi mil. ⁹Amo ma tikyejyekokah in toTeko kemi sekimeh de yevjah okichijkeh, iva okovavilokeh iva ijko nik oixpolikeh. ¹⁰Nion amo ma tikixnamikikah in toYejwatzi kemi sekimeh de yevjah okichijkeh, iva por eso in ilvikaktlatitlanili tlen temikti ovala okinmixpoloko.

¹¹Nochi yejón tlen okinpanolok omoka kemi se ejemplo para tejavah, iva omijkuilo itech Tiotlajkuiloli pa-

ra technejmachtis tejavah tlen tikateh itech ninmeh sa ik tlami tonaltih. ¹²Ijko pues, tlen kiyejyekova kuali moyekketok itech itlaneltokalis, ma kipia kuidado amo vetzis itech tlajtlakoli. ¹³Ijkuak itla imechyoltilana, amo xikyejyekokah ke in oksekimeh amo no ijko kinpanova. Pero ximotenmachikah inavak toYejwatzi, porke Ye amo imechtekavilis ma imechyoltilana itla okachi chikavak tlen amo velis inkixikoskeh. Ijkuak itla imechyoltilanas, Ye imechititis kenik velis inkitlaniliskeh, iva ijko velis inkixikoskeh.

¹⁴Por eso, notlasojkaiknivah, nion amo sikiera ok xikyejyekokah de inkinmavistiliskeh in diosmeh tlen tlamachivaltih. ¹⁵Nimechtlapovia kemi gentejtih tlen tlayejyekolejkeh, imejavah xikyejyekokah kox kuali o noso amo kuali tlen nimechilvia. ¹⁶Itech tiotlakantlakuali de toTeko, ijkuak tikontilanah in kopa de vino iva tiktlajtlaniliah in toYejwatzi ma kitiochiva, tikteititiah nik teva tipovih itech iesso in Cristo. Iva ijkuak tikpojpostekih in pan, noijki tikteititiah nik teva tipovih itech ikuerpo in Cristo. ¹⁷Maski timiekeh, tinochtin tikuah san se pan, iva por eso timochijtokeh sa se kuerpo.

¹⁸Xikittakah tlen panolo ijkuak in gentejtih de Israel kitlamiktilih in toYejwatzi. ¿Amo kijtosneki nik kateh san sekka ijkuak kikuah in yolkatlamiktilitih de kan artal? ¹⁹Ika nin tlen nimechilvia amo kijtosneki ke in diosmeh tlen tlamachivaltih itla inpati, o noso itla inpati in tlakuali tlen kinmaniliah.

²⁰Tlen nikneki nikijtos yen nin: Ijkuak in gentejtih tlen amo kixmatih Dios kitemakah itla tlamaneli de yolkatlamiktili, amo kimakah yen Dios, sino yen amo kuali ejekameh. Iva ne amo nikneki teva xipovikah invan amo kuali ejekameh. ²¹Imejvah amo velis inkoniskeh ikopa in toTeko iva noijki inkoniskeh inkopa in amo kuali ejekameh. Nion amo velis teva intlakuaskeh de kan imesa in toTeko iva noijki teva intlakuaskeh de kan inmesa in amo kuali ejekameh. ²²¿O noso inkinekih inkichivaskeh in toYejwatzi ma kualani? ¿Kox okachi tichikavakeh in tejavah ke Ye?

Ma tiktemokah tlen kuali para oksekimeh

²³Sekimeh kijtovah: “Velis se kichivas san tlen se kinekis.” Yejón neli, pero amo nochi velis techpalevis. Yi neli, velis se kichivas san tlen se kinekis, pero amo nochi velis techpalevis ma timoskaltikah itech totlaneltokalis. ²⁴Amika ma kitemo kichivas tlen kuali san para ye, sino noijki ma kitemo kichivas tlen kuali para oksekimeh.

²⁵Nochi tlen monemaka kan kinemakah nakatl velis inkikuaskeh, iva amitla xitlajtlanikah de kan vitz yejón nakatl, para inmotzonteko amo ma imechtlajtlakolti de itla. ²⁶Porke in tlaltikpaktli, iva nochi tlen onka itech, iaxka in toTeko.

²⁷Tla se tlen amo tlaneltokak imechnotza xitlakuatih ikalijtik, iva tla inkinekih inyaskeh, xiviah iva xikuakah nochi tlen imechma-

kaskeh, iva amo xitlajtlanikah de kan vitz tlen imechmakah para ijko inmotzonteko amo ma imechteilvi de itla. ²⁸Pero tla ikka imechilvis: “Nin nakatl yokimanilijkah in diosmeh tlen tlamachivaltih”, tonses amo xikuakah para amo xikojkokah tlen ijko omechilvi, iva ijko inmotzonteko amo ma imechtlajtlakolti. Porke in tlaltikpaktli, iva nochi tlen onka itech, iaxka in toTeko. ²⁹Nikijtojtok yen tlen kiyejyekova in oksé itech itzonteko, amo tlen imejvah inkiyejyekovah itech inmotzonteko.

Pero ikka velis kijtos: “¿Tleka amo velis nikchivas itla san por yen tlan velis kiyejyekos in oksé itech itzonteko? ³⁰Tla ne nimotlajsojkamati inavak toYejwatzi por tlen nikhmomajsevia, tonses, ¿tleka nechpojpovaskeh por tlen nikua?” ³¹Ijko pues, tla intlakuaskeh, o noso tla inkoniskeh, o noso inkichivah itla oksé tlamantli, xichivakah nochi para ika xikweijkachivakah in toYejwatzi. ³²Amo xichivakah itla tlen ika velis inkichivaskeh ma vetzikah itech tlajtlakoli in oksekimeh: nion innavak in judiojtih, nion innavak tlen amo judiojtih, nion innavak tlen tlaneltokakeh de toYejwatzi. ³³Ne noijki nikchiva de nikipaktis nochtin ika tlen nikchiva. Amo niktemova nikchivas tlen kuali san para ne, sino niktemova nikchivas tlen kuali para invan oksekimeh, para ma velikah ma momakixtikah.

11 ¹Xichivakah kemín ne nikchiva porke ne nikchiva kemi Cristo okichi.

Kenik moneki yetos ijkuak mololoskeh in tlaneltokakeh

²Noknivah, nimechweijkachiva porke imejvah nochipa innechilnamikih iva inkivelkakah tlen ne onimechmacthi. ³Pero nikneki xikmatikah ke Cristo yen itzonteko in tlakatl, iva in tlakatl yen itzonteko in sivatl, iva Dios yen itzonteko in Cristo. ⁴Tla se tlakatl mokuatlakentia ijkuak modiestzajtzia o noso ijkuak tiotenejmacthia, kijtosneki kipijpinatia in Cristo. ⁵Pero tla se sivatl amo mokuatlakentia ijkuak modiestzajtzia o noso ijkuak tiotenejmacthia, kijtosneki kipijpinatia itotata. Yejón iwál kemi oyeskia omokuaxinki. ⁶Tla se sivatl amo mokuatlakentia, okachi kuali ma kixima nochi itzonteko. Pero tla pinava motzonkaltekis o noso mokuaximas, tonses ma mokuatlakenti. ⁷In tlakatl mach moneki mokuatlakentis, porke in toYejwatzi okichijchi in tlakatl kemi Ye iva itech in tlakatl motta imavissotlanex in toYejwatzi. Pero in sivatl itech motta imavissotlanex in tlakatl. ⁸Porke in tlakatl amo valajtok de itech sivatl, sino in sivatl valajtok de itech tlakatl. ⁹Iva toYejwatzi amo okichi in tlakatl para ma kipalevi in sivatl, sino toYejwatzi okichi in sivatl para ma kipalevi in tlakatl. ¹⁰Por eso, iva por yen ilvikaktlatitlaniltih tlen techvalitokeh, in sivatl moneki mokuatlakentis para kiteititis nik kipia akin kinavatia. ¹¹Pero tejvah tlen titlaneltokah inavak toTeko,

in tlakatl amo velis yetos iselti tla amo kias in sivatl, nion in sivatl amo velis yetos iselti tla amo kias in tlakatl. ¹²Iva maski yi neli in sivatl valajtok de itech in tlakatl, noijki yi neli axka in tlakatl nesi de itech in sivatl, pero nochi vitz de toYejwatzi.

¹³Imejvah inmonevia xikyejyekokah kox kuali tla se sivatl modiestzajtzi inavak toYejwatzi iva amo mokuatlakentis. ¹⁴Nochtin kuali kimatih nik tepinati tla se tlakatl yetos tzonkalweweyak. ¹⁵Pero tla se sivatl kias itzonkal weweyak yejón kikualnextia, porke toYejwatzi okimakak itzonkal weweyak para ika ma mokuatlakenti. ¹⁶Iva tla íkka amo kipaktia tlen nikijtova iva kineki motlatlajtolnamikis ika nin tlajtoli, ma kimati ke nion tejvah iva nion oksekimeh tlaneltokakeh de toYejwatzi amo tikpiah oksé kostumbre para tikinchivaskeh ninmeh tlamantih.

Amijtok tlen okichivayah itech tiotlakantlakuali de toTeko

¹⁷Pero axka tlen nimechilvis, amo velis nimechweijkachivas. Porke nesi ke ijkuak inmololovah yej san ik inmokoikovah iva amitla imechpalevia. ¹⁸Tlen achto nikneki nikijtos, yen tlen yonikmatki ke ijkuak inmololovah kemi intlaneltokakeh imejvah innoxexelovah, iva kana ne nikneltoka. ¹⁹Iva kipia tlen ijkó panolos para mottas akinmeh de imejvah yi neli intlaneltokah. ²⁰Ijkuak imejvah inmololovah, ayakmo neli imechtekipachova para inki-

sepankuaskeh in tiotlakantlakuali de toTeko. ²¹Porke ijkuak inmololovah, kada se san niman peva kikua itlakual iva amo kinchia tlen oksekimeh para tlakuaskeh san sekka. Iva ijkó, sekimeh mokavah ika tiojsivilistli, mientras oksekimeh asta moivintiah. ²²¿Ke amo inkipiah inmokalijtik kan velis intlakuaskeh iva intlakoniskeh? ¿Tleka inkinekih inkinmavispoloskeh in tlaneltokakeh de toYejwatzi, iva inkinekih inkinpijpinatiskeh tlen amitla kipiah? ¿Tlán velis nimechilvis? ¿Nimechweijkachivas por yejón? ¡Amo! Mach velis nimechweijkachivas.

Tiotlakantlakuali de toTeko

(Mt. 26:26-29; Mr. 14:22-25; Lc. 22:14-20)

²³Tlen toTeko onechmachi, yen yejón noijki tlen ne yonimechmachi: Neká yovak ijkuak okitemaktijkeh in toTeko Jesús, Ye okitilanki in pan, ²⁴omotlasojkamati inavak toYejwatzi, okipojpostekki in pan iva okijto: “Xiktilanakah, xikkuakah. Nin yen nokuervo tlen niktemaka por imejvah. Ijki xikchivakah para ika techilnamikikah.” ²⁵Ijkó noijki, ijkuak otlanki otlakuajkeh, okitilanki in kopa iva okijto: “Nin kopa de vino yen noesso, tlen toYejwatzi ika kichiva se yankuik moyekkavalistli inmovah. Nochipa ijkuak inkoniskeh yejón kopa de vino, xikchivakah para ika techilnamikikah.” ²⁶Ijkó pues, nochipa ijkuak inkikuaskeh yejón pan iva inkoniskeh yejón vino, kijtosneki inkitematiltijtokeh imikilis in toTeko asta ijkuak Ye valmuikas.

Kenik moneki se kikuas in tiotlakantlakuali de toTeko

²⁷Toneses, tla íkka kikua yejón pan iva koni yejón kopa de vino de toTeko iva amo kichiva kemi moneki, tlajtlakolchiva inavak ikuervo in toTeko iva inavak iesso. ²⁸Por eso, kada se achto ma momachili kenomi nik kajki antes de kikuas in pan iva konis in kopa de vino. ²⁹Porke tla íkka kikua in pan iva koni in kopa de vino, iva amo kimomaka kuenta ke motratarova de ikuervo in Cristo, in Dios kitlajyoviltis. ³⁰Ika, miekeh de imejvah inmokokovah o noso amo inchikavakeh, iva noijki sekimeh yoixpolikeh. ³¹Pero tla achto otomachiliskiah kenomi nik tikateh, in toYejwatzi amo otechtlajyoviltiskia. ³²Pero ijkuak toTeko techtlajyoviltia, yejón para techmelavas, iva ijkó amo techtlajtlakoltis san sekka invan taltikpaktlakah tlen amo tlaneltokah inavak.

³³Ijkó, noknivah, ijkuak inmololoskeh para inkikuaskeh in tiotlakantlakuali de toTeko, ximochiakah asta ijkuak inyeskeh innochtin. ³⁴Iva tla íkka tiojsivi, ma valtlakuajteva ikalijtik, para ijkó Dios amo imechtlajyoviltis por kenomi nik inkichivah ijkuak inmololovah. Tlen okseki tlamantli nikyektlalis ijkuak nias nimechititi.

Velitilistli tlen techmaka in Tioijyotzintli

12 ¹Axka, noknivah, nikneki xikmatikah de yen velitilistli tlen kitemaka in Tioijyotzintli.

²Ijkuak imejvah ayamo on-tlaneltokayah inavak Cristo, omechtlaninemiah kemi oyeskia amo intlachiah para onkinmavistiliayah in diosmeh tlamachivaltih tlen amo tlajtovah. ³Por eso, nikneki xikmatikah ke tlen tlajtova ika iTioijyotzi in Dios amo velis kitenevilis fiero in toTeko Jesús. Iva amika velis kinotzas in Jesús kemi iTeko tla amo ika Tioijyotzintli.

⁴Onka tlatlamantli velitilistli, pero nochi valajtok san itech se Tioijyotzintli. ⁵Onka tlatlamantli tekittl para se kitekipanos in toTeko, pero san se toTeko tlen tiktekipanovah. ⁶Kada se de tejavah veli tikchivah tlatlamantli tekittl, pero san se Dios tlen tekipanova itech tinochtin tejavah iva techpalevia itech nochi tlen tikchivah. ⁷Kada se de tejavah Dios otechmakak se velitilistli tlen kiteititia ke in Tioijyotzintli kajki totech, para ika tikinpaleviskeh nochtin oksekimeh tlaneltokakeh. ⁸Sekimeh in Tioijyotzintli kinmaka velitilistli para ma tlajtokah ika tlamatilistli, oksekimeh in Tioijyotzintli kinmaka velitilistli para ma tlajtokah ika miek ixtlamatilistli. ⁹Oksekimeh in Tioijyotzintli kinmaka velitilistli para ma kipiakah miek tlaneltokalistli, iva oksekimeh in Tioijyotzintli kinmaka velitilistli para ma kinpajtikah in kokoxkeh. ¹⁰Oksekimeh kinmaka velitilistli para ma kinchivakah tetzavimeh, oksekimeh para ma tiotenejmachtikah, oksekimeh para ma kimomakakah kuenta itla koxvitz de yen Tioijyotzintli o noso de yen amo kuali ejekameh, oksekimeh

para ma tlajtokah ika oksekimeh tlajtoltih, iva oksekimeh para ma velikah ma kiteajsikamatiltikah tlen se kijtova ika yejonmeh tlajtoltih. ¹¹Pero nochi nin tlamantli, kichiva san se mismo Tioijyotzintli, iva yen kijtova tlán velitilistli moneki kimakas kada se.

Tinochtin timochijtokeh san se kuerpo

¹²Tokuerpo kipia miek partes, pero nochtin partes motlamih sa se kuerpo. Ijkó noijki ikuerpo in Cristo. ¹³Porke tinochtin tejavah, tijudiojtih o noso amo judiojtih, titlakatlakovaltih o noso amo tlakatlakovaltih, tinochtin otimobautisarojkeh san ika se Tioijyotzintli para ma timochijtokah sa se kuerpo, iva tinochtin otikselijkeh san se mismo Tioijyotzintli.

¹⁴Se kuerpo amo kipia san se parte, sino kipia miek partes. ¹⁵Tla se tokxi okijtoskia: “Komo ne amo nimitl, amo nipovi itech kuerpo”, amo por ijkó kijtos ayakmo povis itech kuerpo. ¹⁶Iva tla tonakas okijtoskia: “Komo ne amo niixtololotl, amo nipovi itech kuerpo”, amo por ijkó kijtos ayakmo povis itech kuerpo. ¹⁷Tla nochi in kuerpo oyeskia ixtololotl, ¿kenik otlakakiskia? Iva tla nochi in kuerpo oyeskia nakastli, ¿kenik otlajnekuiskia? ¹⁸Pero toYejwatzi okitlali kada se parte de tokuerpo kan Ye okinekki. ¹⁹Tla nochi oyeskia san se parte, ¿kan oyeskia in kuerpo? ²⁰Pero toYejwatzi okinchi miekeh partes, pero nochtin mochijtokeh san se kuerpo.

²¹In toixtololo amo velis kilvis in tomah: “Mach notech timoneki”, nion toztonteko amo velis kinmilvis in tokxivah: “Mach notech inmonekih.” ²²Yejón mach veli, porke in partes de tokuerpo tlen tikinmitah okachi amo chikavakeh, yejvah tlen okachi monekih. ²³Iva in partes tlen tikinmitah amo okachi itla inpati, yejvah okachi tikinyektzotzoltiah ika miek kuidado. Iva in partes tlen amo tiknekih tikinnextiskeh, yejvah okachi tikinmalviah, ²⁴pero in partes tlen veli tikinnextiah, amo moneki tikinmalviskeh ijkó. ToYejwatzi ijkó okichi in tokuerpo para okachi ma tikinmakakah tetlakitalistli iva ma tikinkuidarokah in partes tlen tikinmitah kemi amo okachi itla inpati, ²⁵para ijkó in partes de tokuerpo amo ma yetokah sesekka, sino nochtin ma motekipachokah se ivan oksé. ²⁶Tla se parte de tokuerpo tlajyovia, nochtin in oksekimeh partes noijki tlajyoviah. Iva tla se parte de tokuerpo kiselia tetlakitalistli, nochtin oksekimeh partes pakih.

²⁷Nochtin imejvah inmochijtokeh ikuervo in Cristo, iva kada se de imejvah in povih se parte de itech ikuervo. ²⁸Intech in tlaneltokakeh, in toYejwatzi achto okintlali in tiotlatitlaniltih, satapa okintlali in tiotenejmachtijkeh iva satapa okintlali tlen tlamachtijkeh. Noijki okintlali tlen kinchivah tetzavimeh, iva tlen kinpajtiah kokoxkeh, noijki tlen tlapaleviah, iva tlen tlayakankeh, iva tlen tlajtovah ika oksekimeh tlajtoltih. ²⁹Amo nochtin

kichivah in tekitl de tiotlatitlaniltih, amo nochtin tiotenejmachtiah o noso tlamachtiah. Noijki amo nochtin velih kinchivah tetzavimeh ³⁰o noso kinpajtiah kokoxkeh. Amo nochtin velih tlajtovah ika oksekimeh tlajtoltih, nion amo nochtin velih kiteajsikamatiltiah tlán kijtosneki tlen kijtovah ika yejonmeh tlajtoltih. ³¹Pero imejvah xiknekikah de inkinpiaskeh in velitilistih tlen okachi kuajkualtih. Iva axka, ne nimechititis se tlamantli tlen okachi wei kijtosneki.

In tlasojtlistli

13 ¹Tla ne onitlajtoskia ika nochtin tlajtoltih de nin tlaltikpaktli iva ika intlajtol in ilvikaktlatitlaniltih, iva tla amo nitetlasojtla, tonses onieskia san kemi se tepostli tlen san tzilini o noso kemi se platiyo tlen san chalani. ²Tla ne onikpiaskia velitilistli para nitiotenejmachtis, iva tla onikajsikamatiskia nochi tlamantli tlen amika kimati de toYejwatzi, iva tla onikpiaskia nochi in ixtlamatilistli, iva tla onikpiaskia miek tlaneltokalistli tlen ika oveliskia onikinmijkuaniskia in tepemeh, pero tla amo nitetlasojtla, tonses amitla nopati. ³Iva tla nikinxejxelilis in prowestih nochi tlen nikpia, iva tla asta niktemakas nokuerpo para ma kitlatikah, pero tla amo nitetlasojtla, tonses nochi yejón amitla nechpalevis.

⁴Tlen tetlasojtla kimati tlixikova itech nochi tlamantli, kualitlakatl, amo kipia nexikolistli, amo machitl, amo moweineki, ⁵amo

monejnemitia itech tlen amo yompa, amo kitemova tlen kuali san para ye, amo niman kualani, amo sa kilnamiktok tlen amo kuali tlen okitoktijkeh, ⁶amo paki ika tlen amo kuali, sino paki ika tlen melajkayotl. ⁷Tlen tetlasojtla nochi kijyovia, nochi kineltoka, itech nochi kipia nechialistli iva nochi kixikova.

⁸In tlasojtlalistli amo semi tlamis. Ajsis tonali in velitilistli para se tiotenejmachtis tlamis. In velitilistli para se tlajtos ika oksekimeh tlajtol-tih tlamis, iva in velitilistli para se kipias ixtlamatistli noijki tlamis. ⁹Porke in velitilistli de ixtlamatistli iva de tiotenejmachtistli tlen tikpi-ah amo nochi ajsitok, ¹⁰pero ijkuak vitz tlen ajsitok iva yektik, ijkuakó tlen amo ajsitok tlamis.

¹¹Ijkuak ne onikatka nichokotzi, onitlapovaya, onikyejyekovaya iva onikajsikamatia kemi se chokotzi. Pero axka yi niwei tlakatl, iva yonika tlakuitlapa tlen onikchivaya ijkuak ok nichokotzi. ¹²Axka tikixmatih in toYejwatzi san kemi oyeskia mach veli tikyekittah, san kemi ijkuak timotlajtlatah itech se teskatl tlen san tlapuyavatok. Pero ijkuak nochi yetos yektik, timot-askah ivan toYejwatzi. Axka amo ajsitok nik nikixmati, pero ijkuak nochi yetos yektik, velis nikixmat-iskah kemi Ye nechixmati. ¹³Onka eyi tlamantli tlen yeskeh para semijjak: in tlaneltokalistli, in nechialistli iva in tlasojtlalistli. De ninmeh eyih, tlen okachi wei kijtosneki yen tlasojtlalistli.

Ijkuak se tlapova ika oksekimeh tlajtol-tih

14 ¹Xikchivakah de xitetlasojtlakah, iva xikchivakah de xikinpiakah velitilistih tlen Tioijyotzintli kintemaka, pero tlen okachi moneki inkipiaskeh yen velitilistli para velis intiotenejmachtiskeh. ²Tlen tlapova ika oksekimeh tlajtol-tih, amo kintlapoviah in gentejtih, sino kitlapovia in toYejwatzi, porke amika kajsikamati. Tlajtova ika ive-litilis in Tioijyotzintli seki tlamantli tlen amika kimati. ³Pero tlen tiotenejmachtia, kintlapovia in gentejtih para ma moskaltikah itech intlaneltokalis, para ma moyolchikavakah iva para ma moyolalikhah. ⁴Tlen tlapova ika oksekimeh tlajtol-tih, san ye mismo moskaltia itech itlaneltokalis. Pero tlen tiotenejmachtia, kinmiskaltia itech intlaneltokalis tlen tlaneltokakeh.

⁵Ne oniknekiskia ke nochtin imejvah xitlapovakah ika oksekimeh tlajtol-tih, pero okachi oniknekiskia yen xitiotenejmachtikah. Tlen tiotenejmachtia okachi tlapanavijtok ke se tlen tlapova ika oksekimeh tlajtol-tih, pero nin noijki kuali tla onka akin kiteajsikamatiltis, para ke in tlaneltokakeh ma moskaltikah itech intlaneltokalis. ⁶Noknivah, tla ne nias nimechitati iva nimechtlapovis ika oksekimeh tlajtol-tih, ¿velis nimechpalevis ika yejón? ¡Pos amo! Pero velis nimechpalevis tla nimechmatiltis itla tlen toYejwatzi nechnextilia, o noso tla nimechmakas itla ixtlamatistli, o noso

itla tiotenejmachtlistli, o noso itla tiotlamachtlistli.

⁷Ijkó noijki, in tlatzotzonaltih, kemi in akatlapitzali ivan arpa, tla amo kipapatiliah nik kakisti, ¿kenik se kimatis tlán kitzotzontokeh? ⁸Iva tla itech se guerra, in tlapitzali amo kakilistli, amika sa moyektla-lijtos para yaski itech momagalistli. ⁹Noijki ijkó panolo inmovah, tla in-tlajtovah ika tlajtoltih tlen amo se kikakilia, amika velis kimatis tlán inkijtovah. Yejón san kemi oyeskia inkitlapoviah in ejekatl. ¹⁰Itech nin taltikpaktli onka miek tlatlamantli tlajtoli tlen ik tlapovah in taltik-paktlakah, iva kada se de yejonmeh tlajtoltih kakilistih. ¹¹Pero tla íkka nechtlapovia iva ne amo nikakilia tlen kijtova, ye kiyejyekos ke ne nivitz de okseka. Iva ne noijki ijkó nikyejyekos, tla ye amo nechkakilia tlen nikijtova. ¹²Por eso, komo imejvah yi neli inkinekih inkinpi-askheh in velitilistih tlen kitemaka in Tioijyotzintli, tonses xikchivakah de xikinpiakah in velitilistih tlen ma kinpalevi in tlaneltokakeh ma moskaltikah itech intlaneltokalis.

¹³Por eso, tlen tlapova ika oksekimeh tlajtoltih, moneki ma kitlajtlanili in toYejwatzi ma kimaka velitilistli para velis kite-ajsikamatiltis tlen kijtova. ¹⁴Tla ne nimodiestzajtzia ika oksé tlajtoli, san yen notonal modiestzajtzia, pero itech noajsikamatilis amo nikmati tlán nikijtova. ¹⁵¿Tonses tlán nikchivas? Pos nimodiestzajtzilis iva nitlakuikas ika notonal, pero noijki nimodiestzajtzilis iva nitlakuikas

ika noajsikamatilis. ¹⁶Porke tla te tikweijkachiva in toYejwatzi san ika motonal, iva tla mitzkakis se tlen ompa otlakakito, amo velis kijtos “Amén” itech motlasojkamachilis inavak toYejwatzi porke amo kimati tlán tikijtova. ¹⁷Iva maski motlasojkamachilis ma yeto yi neli kualtzi, pero tlen oksé tlen mitzkaktok amo kipalevis ma moskalti itech itlaneltokalis. ¹⁸Ne niklasojkamachilia in toYejwatzi porke okachi nitlapova ika oksekimeh tlajtoltih ke nochtin imejvah. ¹⁹Pero kan mololovah in tlaneltokakeh okachi kuali nikneki nikijtos kana makuili tlajtoli tlen ma yeto kakilistli iva ma kinpalevi oksekimeh, iva amo nikijtos kana majtlaktli mil ika oksekimeh tlajtoltih tlen amo kakilistih.

²⁰Noknivah, amo xikyejyekokah kemi inkonemeh. Xiekah kemi inkonemeh para yen tlen amo kuali, pero xiekah kemi yinwejweih ika tlen inkiyejyekovah. ²¹Itech Tio-tlajkuiloli kijtova: “Ika oksekimeh tlajtoltih iva ika inten tlen vitzeh de okseka, nikintlapovis ninmeh nogentejvah, pero maski ijkó amo nechkakiliskah, kijtova in toTeko.” ²²Ijkó pues, ijkuak se tlapova ika oksekimeh tlajtoltih, yejón se nes-kayotl para tlen amo tlaneltokakeh, iva amo para tlen tlaneltokakeh. Pero ijkuak se tiotenejmachtia, yejón para tlen tlaneltokakeh, iva amo para tlen amo tlaneltokakeh. ²³Tla nochtin tlaneltokakeh mololoskeh, iva nochtin pevas tlapovaskeh ika oksekimeh tlajtoltih, iva kalakitivih tlen ompa otlakakitoh o noso

tlen amo tlaneltokakeh, yejvah velis kiyejyekoskeh ke yonkuatlapoljkeh. ²⁴Pero tla nochtin pevas tiotenejmachtiskeh, iva kalakitivih tlen ompa otlakakitoh o noso tlen amo tlaneltokakeh, ijkuakó yejvah kimomakaskeh kuenta nik tlajtlakolejkeh iva pevas moyolpejpenaskeh por nochi tlen kijtojtokkeh. ²⁵Iva momatis nochi tlen kitlaatijtokkeh itech inyolo, iva motlankuaketzaskeh kimavistiliskeh in toYejwatzi, iva kijtoskeh ke in toYejwatzi yi neli kajki inmovah.

**Xikchivakah ijko kemi
moneki iva amo san nelivis**

²⁶Tonses, noknivah, ijkuak inmoloskeh, nochi tlen inkichivaskeh xikchivakah para ximoskaltikah itech inmotlaneltokalis. Sekimeh velis tlakuikaskeh, oksekimeh velis tlamachtiskeh, o noso velis kitematiltiskeh tlen toYejwatzi kinnextilia, oksekimeh velis tlapovaskeh ika oksekimeh tlajtoltih, o noso velis kiteajsikamatiltiskeh tlen se kijtova ika yejonmeh tlajtoltih. ²⁷Iva ijkuak tlapovaskeh ika oksekimeh tlajtoltih, ma tlapovakah san kana omeh o asta eyih, iva ma kintokarojti sesesjenmeh. Iva moneki ikka ma kiteajsikamatilti tlen kijtovah. ²⁸Pero tla amo onka akin kiteajsikamatiltis, okachi kuali amika ma tlapova ika oksekimeh tlajtoltih kan inmololovah, o noso ma tlapovakah san para yejvah mismo iva para toYejwatzi. ²⁹Ijko noijki, ma tlapovakah san kana omeh o noso eyih tlen tiotenejmachtiah.

Tlen oksekimeh ma kikakikah, iva ma kiyejyekokah kox vitz de toYejwatzi o noso amo tlen kijtovah. ³⁰Pero tla se tlen ompa yetok toYejwatzi kinextilia itla para ma kitematilti, ijkuakó tlen tlapojtok ayakmo ma tlajto, iva ma kikavili tlen ompa yetok ma kijto tlen kineki kijtos. ³¹Ijko, nochtin velis tiotenejmachtiskeh sesesjenmeh, para nochtin ma kimomachtikah iva ma moyolchikavakah. ³²Tlen tiotenejmachtia kimati motlakavaltia, iva kimati keman tlajtos iva keman amo. ³³Porke in toYejwatzi amo kipaktia ma mochiva itla san nelivis, sino kineki ma yeto yolsevilistli itech nochi tlen mochiva.

Ijko kemi kichivah nochtin ik sentetl kan mololovah tlen iaxkavah in toYejwatzi, ³⁴in sivameh amo ma tlajtokah ijkuak inmololovah. In sivameh amo kintokarova tlajtoskeh, sino moneki ma kinkavilikah yejvah intotatahavah ma kinyakanakah ijko kemi kijtova itlanavatil Moisés. ³⁵Tla in sivameh kinekih kimatiskah itla, ma kintlajtlanikah intotatahavah itech inkalijtik. Porke amo kualtzi motta se sivatl ma tlajto kan inmololovah.

³⁶Moneki xikmatikah ke itlajtol in toYejwatzi amo imejvah inmotech opejki, iva nion amo san imejvah onkiselijkeh. ³⁷Tla ikka momachilia tiotenejmachtia o noso momachilia ke itech kajki in Tioijyotzintli, ma kimomaka kuenta ke nin tlen nimechijkuililia yejon se tlanavatili de toYejwatzi. ³⁸Pero tla amo kineki kiselis kemi tlanavatili de toYejwa-

tzi, tonses noijki amo ma kiselikah tlen ye kijtos.

³⁹Ijkó pues, noknivah, xikchivakah de xikpiakah in velitilistli para intiotenejmachtiskeh, iva amo xikintzatzakuilikah in tlaneltokakeh ma tlajtokah ika oksekimeh tlajtoltih. ⁴⁰Pero nochi tlen inkichivaskeh, xikchivakah ijko kemi moneki iva amo san nelivis.

Cristo omoyoliti

15 ¹Axka, noknivah, nikneki nimechilnamiktis in yankuik kualitlajtoli tlen ne onimechtlapovi. Imejvah onkiselijkeh ika pakilistli iva asta axka itech inmoyekketokeh. ²Iva tla imejvah inkivelkaktoskeh yejón yankuik kualitlajtoli tlen ne onimechtlapovi, yi neli inmomaxitiskesh. Pero tla amo, san por tekittl onkineltokakeh.

³Ne onikseli se tlamachtili tlen okachi wei kijtosneki iva ne onimechpanoltili: ke Cristo oixpolivik por yen totlajtlakol, ijko kemi kijtova in Tiotlajkuiloli. ⁴Okitookakeh, iva ipan eyi tonali omoyoliti, ijko kemi kijtova in Tiotlajkuiloli. ⁵Okimonextili in Pedro, iva satepa okinmonextili tlen majtlaktli ivan ome tiotlatitlaniltih. ⁶Satepa okinmonextili okachi de makuili sientto toknivah tlaneltokakeh ijkuak oololitokah. Miekeh de yejvah ok onkateh, iva sekimeh yoixpolikeh. ⁷Satepa okinmonextili in Jacobo, iva satepa okinmonextili nochtin tiotlatitlaniltih.

⁸Iva satepa de nochtin, ne noijki onechmonextili, kemi se konetl

tlen oneski ijkuak yopanok tonali. ⁹Ne okachi nitzikitzi de nochtin tlen oksekimeh tiotlatitlaniltih, iva nion amo notech povi ma nechnotzakah nitiotlatitlanili, porke ne fiero onikintokti in tlaneltokakeh de toYejwatzi. ¹⁰Pero por yen iiknomachilis in toYejwatzi axka ne nitiotlatitlanili. Iva iiknomachilis tlen onechmakak amo san tekittl, porke ne yonitekipano okachi ke nochtin tlen oksekimeh tiotlatitlaniltih. Maski yi neli mach ne onitekipano sino yen iiknomachilis in toYejwatzi tlen kajki nova. ¹¹Pero amo kipia tlen kittas tla ne nitetlapovia o tla tetlapoviah tlen oksekimeh tiotlatitlaniltih, tlen kipia tlen kittas yen tinochtintetlapoviah de yejón yankuik kualitlajtoli tlen imejvah yonkineltokakeh.

In mikameh moyolitiskesh

¹²Axka pues, tla titetlapoviah nik omoyoliti in Cristo, tonses, ¿kenik sekimeh de imejvah kijtovah ke amo velis moyolitiskesh in mikameh? ¹³Porke tla in mikameh amo velis moyolitiskesh, tonses Cristo noijki amo omoyoliti. ¹⁴Iva tla Cristo amo omoyoliti, tonses amitla ipati tlen tejevah titetlapoviah, iva inmotlaneltokalis noijki amitla ipati. ¹⁵Tla ijko oyeskia, tonses otieskiah kemi titekajkayajkeh ika tlen titetlapoviah de toYejwatzi, porke tikijtovah nik in Ye okiyoliti in Cristo. Tla yi neli oyeskia amo velis moyolitiskesh in mikameh, tonses noijki mach neli ke toYejwatzi okiyoliti in Cristo.

¹⁶Porke tla in mikameh amo velis moyolitiskah, tonses nion Cristo amo omoyoliti. ¹⁷Iva tla Cristo amo omoyoliti, tonses inmotlaneltokahis amitla ipati, iva kijtosneki ok inkateh itech tlajtlakoli. ¹⁸Iva tla ijkó oyeskia, tos tlen otlaneltokakeh inavak Cristo iva yoixpolikeh, yi neli omopolojkeh. ¹⁹Tla tonechialis inavak Cristo oyeskia san para itech nin nemilistli, tos de nochtin tlaltikpaktlakah tejvah okachi otiktemakaskiah lástima.

²⁰Pero Cristo yi neli omoyoliti, iva yen achto omoyoliti de nochtin tlen satepa moyolitiskah. ²¹Ijkó kemi in mikilistli ovala por yen tlen okichi se tlakatl, axka noijki in moyolitilistli ovala por yen tlen okichi in oksé tlakatl. ²²Ijkó kemi itech Adán tinochtin tiixpolivih, ijkó noijki itech Cristo tinochtin timoyolitiskah. ²³Pero sesejsenmeh kintokarojtiash moyolitiskah: achto yen Cristo, iva satepa ijkuak Ye valmuikas, moyolitiskah tlen otlaneltokakeh inavak. ²⁴Para ompa, tlamis in tlaltikpaktli, ijkuak Cristo kintlanilis nochtin tlen tlatlanavatijkeh, nochtin tlen kipiah tlanavatij kayotl iva nochtin tlen kipiah velitilistli. Iva ijkuakó Cristo kitemaktis itlanavatij kayo inavak toTajtzin Dios. ²⁵Porke Cristo kipia tlen tlanavatis asta ijkuak nochtin tlen kitlavelitah ma kintlali itlampa ikxivah. ²⁶Iva sa ik tlamis mokavati sa se tetlavelitah tlen Cristo kipopolos, kijtosneki yen mikilistli. ²⁷Porke toYejwatzi okitlali imak in Cristo nochi tlamantli para ma kinavati. Ijkuak kijtova nochi,

amo kijtosneki ke asta ivan toYejwatzi noijki kinavatiskeh, porke yen toYejwatzi okitlali imak in Cristo nochi tlamantli para ma kinavati. ²⁸Iva ijkuak Cristo, tlen teKone de Dios, yi kiplas nochi tlamantli imak, ijkuakó inevia motlalis imak toYejwatzi, porke yen okitlali imak nochi tlamantli para ma kinavati. Iva ijkó toYejwatzi yen ma yeto nochi itech nochi tlamantli.

²⁹Tla in mikameh amo moyolitiskah, ¿tonsas tleka sekimeh mobautisarovah inpatka tlen yoixpolikeh, iva kiyejyekovah ijkó velis kinmakixtiskah? Tla yi neli in mikameh amo moyolitiskah, ¿tlán para mobautisarovah por yejvah?

³⁰Iva tejvah, ¿tlán para tiktlalialah nochipa itenko mikilistli in tonemilis? ³¹Nikneki xikmatikah ke momostla nika itenko mikilistli. Noknivah, nin tlen nimechilvia yi neli, ijkó kemi noijki yi neli nikpia pakilistli por imejvah kemi intlaneltokakeh inavak toTeko Jesucristo. ³²Kan ciudad de Éfeso miekeh nopan oyajkeh kemi yolcameh tekuanimeh. Pero tla amo moyolitiskah in mikameh, tonsas, ¿tlán oniktlaniki? Okachi kuali ma tikchivakah kemi sekimeh kijtovah: “Ma titlakuakah iva ma tikonikah, porke mostla vip-tla tiixpoliviskah.”

³³Amo ma imechkajkayavakah. Yompa kemi kijtova in tlajtoli: “Tlen teyayakankeh itech tlen amo kuali kinkuapah amo kualmeh tlen kinnekih moyeknejnemitiskah itech innemilis.” ³⁴Kuali xikyejyekokah tlen inkichivah, iva ayakmo xitlaj-

tlakolchivakah. Porke sekimeh de imejvah amo kixmatih in toYejwatzi. Ijkí nimechilvia para xipinavakah.

Kenik moyolitiskah in mikameh

³⁵ Pero íkka velis tlajtlanis: “¿Kenik moyolitiskah in mikameh? ¿Tlán kuerpo kipiaskah?” ³⁶ Yi neli ton-to tlen íjkó tlajtlanis! Porke ijkuak tiktookah itla semiya, achto miki iva satepa moyolitia. ³⁷ Iva tlen tiktookah amo yen tlatoktli, sino yen semiya, velis yetos de trigo o noso de itla oksé semiya. ³⁸ Iva toYejwatzi kimaka ikuerpo kemi Ye kimonekiltia. De kada se tlamantli semiya moskaltia se tlatoktli ok tlamantli ke oksekimeh. ³⁹ Amo nochtin kuerpojtih san se tlamantli. In tlaltikpaktlakah kipiah se tlamantli inkuerpo, iva in yolkameh kipiah oksé tlamantli inkuerpo. Noijki in totomeh ivan michimeh kipiah tlamantli inkuerpo. ⁴⁰ Noijki kateh kuerpojtih tlen de ilvikak iva kuerpojtih tlen de nin tlaltikpaktli. Pero se tlamantli nik kualtitzintih in kuerpojtih tlen de ilvikak iva oksé tlamantli nik kualtitzintih in kuerpojtih tlen de nin tlaltikpaktli. ⁴¹ In tonali se tlamantli nik petlani, in metzi oksé tlamantli nik petlani, iva in sitlalimeh oksé tlamantli nik petlani. Iva kada se sitlali tlatlamantli nik petlani. ⁴² Ijkó noijki panolos ijkuak moyolitiskah in mikameh. Motooka se kuerpo tlen palani, pero moyolitis se kuerpo tlen amo semi palanis. ⁴³ Motooka se kuerpo tlen fiero motta, pero moyolitis se kuerpo tlen kualtzi mottas.

Motooka se kuerpo tlen amo chikavak, pero moyolitis se kuerpo tlen chikavak. ⁴⁴ Motooka se kuerpo tlen de nin tlaltikpaktli, pero moyolitis ika se kuerpo tlen de ilvikak. Pos íjkó kemi onkateh kuerpojtih tlen de nin tlaltikpaktli, íjkó noijki onkateh kuerpojtih tlen de ilvikak.

⁴⁵ Noijki in Tiotlajkuiloli íjkí kijtova: “Adán yen oyá tlen achto tlakatl iva toYejwatzi okimakak nemilistli ijkuak okichi.” Pero in Adán tlen satepa ovala, kijtosneki yen Cristo, ye se ijyotzintli tlen kitemaka nemilistli. ⁴⁶ Amo achto omochi in kuerpo tlen de ilvikak, sino achto omochi tlen de nin tlaltikpaktli, iva satepa mochivas tlen de ilvikak. ⁴⁷ Tlen achto tlakatl okichijkeh ika tlali de nin tlaltikpaktli. Iva in tlakatl tlen satepa ovala, kijtosneki yen toTeko, in Ye ovala de ilvikak. ⁴⁸ Tlen povih itech tlaltikpaktli kateh kemi in tlakatl tlen okichijkeh de tlali, pero tlen povih ilvikak kateh kemi tlen ovala de ilvikak. ⁴⁹ Iva íjkó kemi tikpiah totlachialis kemi neká tlakatl tlen okichijkeh de tlali, íjkó noijki tikpiaskah totlachialis kemi tlen ovala de ilvikak.

⁵⁰ Noknivah, nikneki nimechilvis, ke tonakayo ivan toesso amo velis kalakiskah kan Dios tlanavatia. Tlen ijtlakavi amo velis povih ivan tlen amo keman ijtlakavi. ⁵¹ Nikneki nimechilvis se tlamantli tlen achto amika okimatia: Amo tinochtin tiixpoliviskah, pero tinochtin timopatlaskeh de tokuerpo. ⁵² Yejón panolos san totoka kemi ijkuak tikintlapovah iva tikintzakuah

toixtololovah, ijkuak sa ik tlami kipitzaskeh in tlapitzali. Porke ijkuak kipitzaskeh in tlapitzali, in mikameh moyolitiskah iva amo ok semi mikiskah. Iva tejvah, tlen ok tiyolitoskeh, timopatlaskeh de to-kuerpo. ⁵³Porke in tokuerpo tlen palani, kipia tlen mopatlas ika tlen amo semi palani. Iva in tokuerpo tlen miki, kipia tlen mopatlas ika tlen amo semi miki. ⁵⁴Iva ijkuak tlen ijtlakavi mopatlas ika tlen amo semi ijtlakavi, iva ijkuak tlen miki mopatlas ika tlen amo semi miki, ijkuakó mochivas tlen kijtova in Tiotlajkuiloli: “In mikilistli yokixpolojkeh, yokitlanilijkeh. ⁵⁵Te mikilistli, ¿kanin kajki motlatlanilis? Te mikilistli, ¿kanin kajki movelitilis para techkojkos?” ⁵⁶Ivelitilis in mikilistli tlen ika tekojkova yen tlajtlakoli, iva ivelitilis in tlajtlakoli yen tlanavati tlen okijkuilo Moisés. ⁵⁷Pero ma tiktlasojkamachilikah in toYejwatzi porke Ye techmaka velitilistli para velis tiktlaniliskah in tlajtlakoli ivan mikilistli por yen toTeko Jesucristo.

⁵⁸Por eso, notlasojkaiknivah, ximoyekketokah iva amitla ma imecholini de itech imotlaneltokalis. Nochipa xitekipoanjtokah okachi itech itekiv in toTeko, iva xikmatikah ke in tekittl tlen inkichivah para yen toTeko amo san tekittl.

Tominolololi para tlen tlaneltokakeh de Jerusalén

16 ¹Axka nikneki nimechilvis de yen tominolololi tlen ika se kinpalevis tlen toYejwatzi iaxkavah. Xikchivakah ijko kemi

yonikinmilvi in tlaneltokakeh tlen kateh itech tlali de Galacia. ²Nochi domingo, kada se de imejvah ma kixelojtiv seki itomi tlen okitlanki. Para ijko, amo yej yikin inkololoskeh ijkuak ne najsiti. ³Iva ijkuak ne najsiti, nikintitlanis para Jerusalén in toknivah tlen imejvah inkinpejpenaskeh para ma kivikakah inmotominolololi. Nikinmakas se amatlajkuiloli para ke in tlaneltokakeh de Jerusalén kuali ma kinselikah. ⁴Iva tla monekis ne no-ijki nias, tonses nias invah.

Pablo kijtova tlen kineki kichivas

⁵Yonikijto nipanans ik región de Macedonia, iva ijkuak yonipanok ik ompa, nias nimechitani. ⁶Mixevia nimokavas kana keski tonali ompa inmovah, o noso mixevia ompa nimokavas asta ijkuak ma pano in tiempo de seva. Ijko imejvah velis innechpaleviskeh ika tlen monekis itech noojviv. ⁷Amo nikneki nimechitikisas san totoka, sino ne nikneki nimokavas ompa inmovah kana keski tonali, tla toTeko kimonekiltis. ⁸Pero ok nimokavas nika Éfeso asta ma pano ilvitl de Pentecostés, ⁹porke nika nikpia se wei lugar kan velis nitetlapovis iva mieceh tlaneltokaskeh, maski miekeh amo kivelitah tlen nikchiva.

¹⁰Tla ompa ajsiti in Timoteo, xichivakah de ma yeto inmonavak ika pakilistli. Ye tekipoanova para toTeko iwal kemin ne. ¹¹Por eso, amika ma kitta kemi oyeskia amitla ipati, sino xikpalevikah para ma viki nonavak ika kuali, porke

nikchixtok ma viki ye invan oksekimeh toknivah.

¹²In tokni Apolos yoniktlatlavti miek ma via invan oksekimeh toknivah ma inmechitatih. Axka mach kineki yas, pero yas imechitati ijkuak velis.

Momakavalistli de Pablo

¹³Xiisatokah iva ximoyekketokah itech imotlaneltokalis. Xikpiakah miek yolchikavalistli iva xiekah inchikavakeh. ¹⁴Nochi tlen inkichivaskeh, xikchivakah ika tlasojtlalistli.

¹⁵Noknivah, imejvah yinkimatih ke Estéfnas ivan ifamilia yejvah achto otlaneltokakeh itech tlali de Acaya, iva yejvah san ik kateh kinpaleviah tlen toYejewatzi iaxkavah. ¹⁶Ne nimechtlatlavtia xikinvelkakah tlen kemi yejonmeh toknivah, iva nochtin tlen tlapaleviah iva tekipanovah itech nin tekintl. ¹⁷Sa tlawel nipaki porke ovalajkeh in Estéfnas, in Fortunato ivan Acaico. Yejvah yonehpalevijkeh ijko

kemi imejvah onnehpaleviskiah tlanika onyeskiah. ¹⁸Yejvah onechyolchikajkeh ijko kemi imejvah noijki omechyolchikajkeh. In toknivah kemi yejonmeh moneki kualixikakilikah.

¹⁹In tlaneltokakeh tlen kateh itech tlali de Asia imechontlajpalovah. Aquila ivan Priscila, iva in tlaneltokakeh tlen mololovah ikalijtik, imechontlajpalovah miek ika itoka in toTeko. ²⁰Imechontlajpalovah nochtin toknivah tlaneltokakeh. Ximotlajpalokah se ivan oksé ika se ixtlapipitzoli de tlasojtlalistli inavak Cristo.

²¹Ne, niPablo, nonevia nimechijkuililia nin tlajpalolistli ika noma.

²²Tla ikka amo kitlasojtla in toTeko Jesucristo, ma ipan vetzi tlajyovolistli de toYejewatzi. ¡Xivalmuika, toTeko!

²³Tlen iiknomachilis in toTeko Jesucristo ma yeto inmovah. ²⁴Ne nimechtlasojtla innochtin imejvah ika itlasojtlalis in Cristo Jesús. Ijko ma yeto.